

痘疹格致要論

痘疹格致要論卷之一

羅田 容齋 萬全 著

○原痘論

上古之時未聞痘痘之證素難之文鮮有及者豈其人淳龐朴野
積精全神虛邪苛毒莫之能害歟或云自建武征虜遂染其毒流
布中國謂之虜瘡或曰聖瘡言其變化莫測也或曰天瘡言為天
行疫癘也或曰百歲瘡言人自少至老必作一番也或曰豌豆瘡
言其形之相似也故病此者如鮑蛻皮如龍蛻骨死生存於呼吸
之間夫上古所無而末世有之抑時世異邪抑人將失之邪予思
其繇天地之氣春夏生養之紀也其物熙熙秋冬殺戮之紀也其

物黷黷時速末世已非泰和之景不可謂非時世之異然人日習
偽不知持滿御神之道七損八益之數務快其心以散其真不可
謂非人自失之也有論穢毒者有論淫火者有論時行正病者靡
有定論將謂穢毒淫火邪則一歲之中大而郡縣小而村落病者
相似而死相繼比屋哭聲穢毒淫火未必人人若此之甚也將謂
時行正病邪何以自少至老但作一度厥後再無傳染也蓋父母
於子一體而分精血之毒已畜於陽施陰化之始顧不待誕生之
頃嚙其血而後有是毒也况男子惜其氣以養其精女子耗其氣
以養其血苟失所養即貽他日之患子之受於父母者雖殊其為
毒則一也豈有男子淫火起於氣為陽毒而易治女子淫火起於

血為陰毒而難治之理邪至於天行正病亦有其時也
所加及有四時不正之氣即有是正病也然則待時而終者胎
毒也或速而危或徐而持或暴而死者氣之微甚所使也然則其
毒洩矣所以終身但作一度後有其氣不復傳染焉

痘為胎毒昭昭矣其間或疎而輕或密而重或重變輕或輕變重
變化叵測是又有說也疎而輕者始終如一審而重者變恠百出
或因父母相傳而然或因疫癘相染而然或因鬼疰相着而然杳
冥恍惚出於聞見思慮之所不及此與智者道之癡人前不必說
夢也何者益疹痘之毒父母原自有之雖嘗作過一番而臟腑經
絡皮毛肌肉骨髓之間餘毒猶有存者一旦分形化氣注之於子

其毒亦隨之洩矣所以子之瘡癰多肯親也加之調攝失宜放恣無忌其毒益甚瘡疽之候沉困危篤者未必非父母之所致也凡子之侏儒跛癈必肖於親兄疹痘之毒乎且人受天地之氣以生天地之氣變人之氣亦變或遇遷正失守淫勝鬱復之紀德令乖常膏苗迭見自然厲氣傳染證候相似所以輕則俱輕重則俱重若有主之者是則疫癘之所為也故人之癘疾而死者精靈不散游魂往來隨氣而行常以其氣注於平人而為之疾如蔡癩之傳染然形質麗厚福澤悠遠者不能相及苟體虛福薄之人陰陽并亂之歲則膏肓之堅臺駘之崇互相迭著反復變化術不能禁工不能治也此非鬼魅之害乎夫治此三者當奈何曰必為之

其毒平其氣遷其處庶乎可免矣

○胎毒論

易曰大哉乾元萬物資始又曰至哉坤元萬物資生夫乾稱父資始者氣之始也坤稱母資生者形之始也人之有生受氣於父成形於母是以毛髮皮膚肌肉筋骨四肢百骸其來固有自矣然則胚胎造化之始精施血受之候輔翼調養抑豈無道邪奈何為父者以酒為漿以妄為常以欲竭其精以耗散其真命門衰敗陽道弗興乃服助陽之劑至於陽火益熾陰水益枯失其乾道此父遺毒於氣之始也為母者徧急妬忌以致衝任氣逆月事不時乃服暖宮之劑煎熬真陰血中伏火失其坤道此母遺毒於形之始也

且古之男子必待婦人月水時下之後與之交媾以成其胎婦人有娠則居側室以保其胎而又不妄作勞飲食必謹今之夫婦不知此理情欲妄動飲食妄嗜此父母之遺毒又不特一朝一夕而已也况子喘息呼吸氣通於親故畜毒於腸胃膜皮毛筋骨之間待時而發或為瘡癰或為驚忤或為丹瘤疔毒之中惟痘最酷如以天地肅殺之氣歲運乖戾之災水土之不齊疫癘之交作則大昏稚殪難以枚舉是雖氣數抑人之所自致然誠使為父母者以繼嗣為重以無後為慮節其嗜慾守其禁忌父之有疾責而治之母之有疾責而治之必使精血和平則陽施陰化氣清形粹子亦不嬰其毒復何夭殤之恫邪

或曰兒在胎之時其母不畏禁忌惡意所欲加添滋味好啖辛酸

或食毒物其氣搏於胞胎之中所以兒受此毒發為瘡疹也殊不知

知人之有生受氣於父成形於母胞胎之毒父當分任其咎未可

專責母也如東垣所論紅絲瘡是已又曰胎在腹中食母微液至生之時啼聲

一發口中所含惡血隨吸而下寄於右腎胞絡之中瘡疹之發乃

下焦相火熾也蓋兒在胞中賴母氣以養其形母懷胎之時天食

以五氣各有所湊也如脾氣湊肝焦氣湊心香氣湊脾氣湊肺腐氣湊腎之類地食以五味

五味各有所入也如酸味入肝苦味入心甘味入脾鹹味入腎之類至於五志之動

各有所傷如怒傷肝喜傷心思傷脾憂傷肺恐傷腎之類兒之受病於母者不特始生

嚙血一事而然也又曰小兒瘡疹五臟之中惟腎無候以在腑下

不能受穢故也夫腎有兩枚左為腎右為命門男子以藏精女子以繫胞胚胎之初精血混合設有其毒腎先受之豈有腎在腑下而不受毒者哉况肝生筋心生血脉脾生肌肉肺生皮毛腎生骨設使腎無所受何以能生骨也既瘡疹諸證起於右腎之下行足太陽之經足太陽膀胱腎之腑也安得謂腎無候乎或曰諸痛痒瘡瘍皆屬心火今謂起於右腎何也經曰顯明之右君火之位也退行一步相火治之君火在相火之右但立名於君位而天氣不加相火者守位而奉天之命以宣行君火之氣所以心者君火也欲彰其德右腎為命門相火代君之令而行之耳故曰起於右腎之下也

昔人謂兒在胞中飢則食母之血渴則飲母之血予獨謂其不然
蓋兒始受氣之時一月胚二月胎不過一點精血凝結中涵生意
也至三月以後其形漸成在胞之中譬諸禽鳥之雛在卵殼中渾
融變化薰蒸滋養惟所受太初之氣漸自生長日月既足乃破其
胎卵而出矣何以能飲食耶必謂有所飲食則胚胎之初形象未
具何飲何食邪且血者渣滓之物入則有出十月之前所飲所食
之血又從何道出邪若生下口含惡血乃母臨蓐之時血穢流溢
入兒口中未必便是先在腹中所食之血也但云兒在胞中滋養
形體長育變化培植蒂者則在母之血液也

○瘡疹性腎無候論

錢氏曰痘疹始出之時五臟證見惟腎無候但見平證耳

龍髓也

耳涼是也。龍耳俱屬於腎其居北方主冷也。後人不知腎獨無候之理，遽謂腎在府下不受穢毒，所以無候，欲專補脾土以制腎水，又欲虛其腎，以免黑陷之變。內經曰：君火之下，陰精承之，五氣不可以偏勝。苟失其平，則為災孽。今瘡毒之火起於三焦，煎熬於肝，燔灼皮肉，非腎水有以制之，則慄悍之勢莫之能禦。惟腎無候者，所以存生生之源，見陰陽造化之妙也。又腎在下而上，骨腎獨無候者，此瘡疹之毒升浮發散而出於外，不然則反陷伏入於內矣。觀其但見平證，謂之平者，乃耳龍如常，不似渾身之熱，非謂其冷也。蓋腎主骨，龍者骨之本也。腎通竅於耳，故龍耳涼為腎平。

病若反熱則火炎水涸真陰敗絕而死不旋踵矣或欲用四君子湯專補脾土以制腎水者殊不知白朮之燥腎之所惡茯苓淡滲腎中津液腎本無候而又伐之所謂誅罰無罪也或見錢氏用百祥丸以下腎之實者又欲虛其腎以防黑隔之變不知百祥丸正謂黑隔為毒氣入腎故以百祥丸下若不煩躁大小便秘安可下之乎謂之實者邪氣實也苟無黑隔而下之寧不反虛其棄自取隔伏之變乎或云以瀉勝脫非瀉腎者此文飾之詞不足信也然則係脾土以制腎水者非歟曰察其虛實如果內虛泄瀉則補脾土使裏氣實瘡疹不致於隔伏若內實則補脾之說正犯實實之戒但云補脾土使毒不隔伏而歸於腎則可謂補脾土以制腎水

則不可

○腎主痘中之水論

論者皆曰痘瘡惟腎無證腎不可實腎實則為黑陷有欲虛其腎之意是未知五行正化之理也蓋心肝脾肺腎五行之所屬也聲色臭味液五行之所化也難經云肝色青其臭臊其味酸其聲呼其液泣心色赤其臭焦其味苦其聲言其液汗脾色黃其臭香其味甘其聲歌其液涎肺色白其臭腥其味辛其聲哭其液涕腎色黑其臭腐其味鹹其聲呻其液唾此五臟之中各具一五行也然肝主色五色之變在乎木也心主臭五臭之變在乎火也脾主味五味之變在乎土也肺主聲五聲之變在乎金也腎主液五液之

變在乎水也此一臟之中統轄一五行也既曰肝為水泡以液出如
水決則腎之液也肺為膿泡以涕出稠濁涕則腎之液也心為
班以血色赤而小血則腎之液也在內為血在外為汗夫五臟之液皆本於
腎如此然則痘中之水腎乃主之至於結痂則土來制水而乾較
所以脾主結痂其色微黃也腎又為封藏之本痘之痂靨腎又主
之觀乎此不可謂腎無證亦不可使之虛也雖曰腎主黑溺乃火
太過水不能勝津液枯萎而變矣

○痘疹五臟證見論

凡病發於一臟惟痘疹之證五臟悉見蓋兒受父母之氣以成形
屬毛離裏喘息畢通肝氣通於筋心氣通於血脉脾氣通於肌肉

肺氣通於皮毛腎氣通於骨髓至發痘疹之時內連臟腑外達百骸所以五臟悉具也故發熱之初呵欠煩悶肝證也乍涼乍熱手足稍冷多睡脾證也面燥腮赤欬嗽嘔噴肺證也驚悸心證也飢涼耳涼腎之平證也於其證之多寡可以知其臟之主病矣自是之後初出一點血心也諸瘡屬心其毒斬關而出血先受之也血化為水肝也肝主淚水泡者淚出如水也水化為膿肺也肺主涕膿泡者似涕稠濁也膿成毒解而結痂者脾也脾屬土萬物功成於土痂皮微黃者土之色也其所以收斂閉藏者肺與腎也肺主收斂腎主閉藏也如初出一點血隱伏皮下不成顆粒者毒伏於心其死至速出於水珠皮肉染丹者毒伏於肝必加痒癩而死出

如麤片皮枯不潤者毒伏於肺必喘呼悶亂而死出於皮下肉先
浮腫者毒伏於脾必至灌腸嘔瀉不食而死出多血泡黑陷者毒
伏於腎必血妄行而暴死矣如物出成癰漸乾黑者玄府閉塞毒
無從出其血先乾轉添悶亂而死者心之病也血化為水浮腫嫩
薄者肌肉已敗必至痒癩肝之病也脾主肌肉肝木尅之脾敗者
死皮破復灌飲食能進此脾土尚強肝木不能犯之也水化為膿
膿未及成忽然收較痂皮焦黑肺之病也未至而至是謂太過反
熱火化也若於空中再出一番此腎不受邪復還於肺從下上者
順也以痘形言之裹束於外者脾也脾虛則易破充拓於裏者氣
也肺主氣肺虛則不起癰榮於根脚者血也肝主血肝虛則色不

榮痘中之水腎也腎虛則乾枯黑陷痒痛者心也心主火實則痛
虛則痒以痘之色言之紅活者心也惡其嬌脆中黑者腎也惡其
焦陷漿白者肺也惡其灰褐蒼臘者肝也惡其青乾淡黃者脾也
惡其肉爛臨病之工審察五臟以施方治無不效矣

○臟腑主證治

肝者罷極之本魂之居也主風惡風其色青屬木其味酸其臭臊
其華在爪其充在筋其液為淚其聲為呼在變動為握開緩於
目○實則目直大叫呵欠頸悶項急○虛則咬牙多欠○熱則
手尋衣領及亂捻物○諸風振掉皆屬於肝

肝苦急匕食其以緩之其草欬散急食辛以散之川芎以辛補

之生姜以酸瀉之芍藥

心者生之本神之變也主驚熱其色赤傷火其味苦其臭焦其華在面其充在血脉其液為汗其聲為笑在變動為噫聞竅於舌○實則叫哭發熱飲水而搖○虛則用卧悸動不安○熱則合面聳口中氣溫上竅咬牙○諸痛痒瘡瘍皆屬於心

心苦緩急食酸以收之五味子欲軟急食鹹以軟之芒硝以鹹補之炒鹽以甘瀉之甘草

脾者倉廩之本營之居也上因惡溫其色黃屬土其味甘其臭香其華在唇四白其充在肉其液為涎其聲為歌開竅於口在變動為噦○實則困睡身熱飲水○虛則吐瀉生風○諸溫腫滿

皆屬於脾

脾苦溫急食苦以瀉之白朮欲緩急食甘以緩之甘草以甘補之人參以苦瀉之黃連

肺者氣之本魄之處也主喘惡寒其色白屬金其味辛其臭腥其華在毛其充在皮其液為涕其聲為哭開竅於鼻在變動為欬○實則悶亂喘促○虛則哽氣長出氣○熱則手搖眉目面○諸氣癰腫皆屬於肺

肺苦氣上逆急食苦以瀉之訶子皮

一作黃芩

欲收急食酸以收之

白芍藥以辛瀉之桑白皮以酸補之五味子

腎者主蛰藏之本精之處也主虛惡燥其色黑屬水其味鹹

腐其華在髮其充在骨其液為唾其聲為呻開竅於二陰又云
開竅於耳在變動為慄○虛則目無精光畏明然骨重○腎怯
則猝失音○諸寒收引皆屬於腎

腎苦燥急食辛以潤之知母黃蘗欲堅急食苦以堅之知母以
苦補之黃蘗

○六氣十二經所主證治

太陽所至為要痛○太陽病發熱腰痛脊強項几几頭痛小便赤
澀○足太陽膀胱經○氣病則腎痛腰似折○血病則狂顛疾
○手太陽小腸經○氣病則嗌痛頰腫○血病則頰腫

寒淫於內治以辛熱佐以苦辛以鹹瀉之以辛潤之以苦堅之

○寒濕所勝平以辛熱佐以苦甘以鹹瀉之

足太陽經麻黃桂枝澤瀉黃蘗○手太陽經生地黃赤茯苓○
二經通用羌活防風藁本

陽明所至爲皴揭○陽明病身熱目赤作渴譫妄大便秘○足陽
明胃經○氣病則喜呻數欠驚妄發狂○血病則唇胗喉痺○
手陽明大腸經○氣病則頸腫○血病則軌衄喉痺

燥淫於內治以苦溫佐以甘辛以苦下之○燥淫所勝平以苦
溫佐以酸辛以苦下之

足陽明經半夏蒼白朮防風○手陽明經連翹秦艽麻仁○二
經通用升麻葛根白芷石膏大黃

少陽所至為嘔嘔瘡瘍惡病暴死○少陽病乍寒乍熱胸脇痛乾
嘔心煩○足少陽膽經○氣病則口苦善太息○血病則腋下
腫○手少陽三焦經○氣病則噎腫喉痺○血病則目銳背痛
煩痛○火淫於內治以鹹冷佐以苦辛以酸收之以苦發之○
火淫所勝平以鹹冷佐以苦甘以酸收之以苦發之以酸復之
○足少陽經半夏草龍胆連翹○手少陽經川芎熟地黃附子
細辛黃耆○二經通用柴胡青皮

太陰所至為中滿吐下○太陰病自利四肢逆冷○足太陰脾經
○氣病則舌本強食則嘔善噫○血病則溱泄○手太陰肺經
○氣病則喘欬○血病則渴煩心○濕淫於內治以苦熱佐以

酸淡以苦燥之以淡泄之○濕淫所勝平以苦熱佐以酸辛以
苦燥之以淡泄之○足太陰經防風蒼白朮當歸白芍藥吳茱
萸黃耆人參甘草砂仁○手太陰經升麻白芷桔梗麻黃黃芩
梔子石膏天麥門冬桑白皮杏仁

少陰所至為瘍疹○少陰病咽痛口舌燥○足少陰腎經○氣病
則善恐○血病則舌乾咽腫嗜卧○手少陰心經○氣病則噎
乾渴而欲飲○血病則衄衄血汁○熱淫於內治以鹹寒佐以
甘苦酸以收之以苦發之○熱淫所勝平以酸寒佐以苦甘以
酸收之○足少陰經附子丁香桂黃耆○手少陰經麻黃桂心
生地黃黃連當歸○二經通用獨活細辛

厥陰所至為嘔泄○厥陰病四肢厥冷時作摘楊舌卷○足
厥陰肝經○氣病則腰痛益乾○血病則嘔逆衄遺溺閉癰
○手厥陰心包絡○氣病則臂肘攣急腋腫脇痛○血病則煩
心掌中熱○風淫於內治以辛涼佐以苦甘以甘緩之以辛散
之○風淫所勝平以辛涼佐以苦甘以甘緩之以酸瀉之○足
厥陰經菴活吳茱萸甘草當歸龍胆草○手厥陰經熟地黃牡
丹皮○二經通用柴胡青皮

凡痘疹發於三陽者可治發於三陰者不可治

痘疹格致要論卷之二

○氣運

瘡疹之候或間數年而發或發則連年不已何也經曰不知年之所加氣之盛衰虛實之所起不可以為工矣蓋司天者主行天之令上之位也歲運者主天地之間人物化生之氣中之位也在泉者主地之化行乎地中下之位也一歲之中有此上中下三氣各行化令氣偶符會而同者則通其化其中於人則病矣所以瘡疹必待其年而發也六十年中天符十二年戊子戊午巳丑巳未戊寅戊申乙卯乙酉丙辰丙戌丙戌丁巳丁亥其中又四年為太乙天符巳未乙酉謂之天符者司天與運同也太乙天符者司天與運及辰之同也歲會八年丙子巳丑丁卯甲辰

甲戌戊午謂之歲命暑運與支同也同天符六年甲辰甲戌庚子
庚午壬寅壬申

同歲者會六年癸卯癸酉癸巳
癸亥辛丑辛未謂之同者謂歲運與在泉合其氣

化陽年曰同天符陰年曰同歲會也五者雜而言之共三十六年

合而言之止有二十六年經曰天符為執法歲位為行令太乙天

符為貴人邪之中人則執法者其病速而危行令者其病徐而符

貴人者其病暴而死也又子午之歲少陰君火主之寅申之歲少

陽相火主之經曰少陰所至為嘔胕少陽所至為噎嘔瘡瘍惡病

暴死凡此數年剛柔失守升降窒抑舊者不退新者不遷則

發而不已也

○疫癘

瘡疹雖胎毒必待時令不正之氣相傳染而發蓋春氣溫和夏氣暑熱秋氣清涼冬氣冷冽此四時正氣之序若春應熱而反寒夏應熱而反清秋應涼而反熱冬應寒而反溫此非其時而有其氣乃不正之令也夫人感之或為寒熱或為癰疽或為喉痺或為腫或為斑疹謂之天行正病又云疫癘是以一歲之中彼此傳染大小相似又若冬溫陽氣暴泄至於來歲必發疹何也蓋小雪以後為終之歲太陽寒水主之水德不彰使厥陰少陰木火之氣反來乘之陽氣早發奉生者少故來春民多病也况瘡疹之毒藏於至陰之下發於太陽之經當其時而動其氣毒乃發矣此冬溫之後必發瘡疹也凡此不正之氣發之泄之解之平之勿犯歲氣是

謂良工故治疫癘者以解毒為急

○部伍

諸瘡皆屬心火心之華在面瘡病之候但以面之部伍占之思過半矣且痘疹陽毒諸陽皆聚於面吉凶善惡尤易見也額屬心火如印堂以上髮際以下橫兩日月角位先見紅點先作漿先結膿者此惡候也蓋心為君主毒發於心故先見於其位君危則十二官皆危其死速矣左臉屬肝木右臉屬肺金如兩臉先見紅點落者吉如相聚作塊其肉硬腫者死蓋肝藏魂肺藏魄生意既絕魂魄將離故不治也頰屬腎承漿橫抵兩頤先見紅點先發先醫者吉此位雖屬腎然三陰三陽之脉皆聚於此陰陽和故可治也

脾爲脾土若準頭先出先壓者凶蓋脾爲土四臟稟命於脾毒餘
於脾土敗則四臟相隨而敗故綿延日久後斃也腎之竅在耳又
云心開竅於耳心腎皆少陰君火也又少陽相火之脉行耳之前
後凡在耳輪先現紅點者凶蓋君相二火用事燔灼之勢難可撲
滅也惟口唇四圍先出先起先壓者大吉蓋陽明之脉俠口環唇
胃與大腸主之無物不受故也

○脉候

瘡疹有形之證無所用診又歲氣主之似不必診經曰微妙在脉
不可不察上之有紀從陰陽始是則不可不診也先哲有言曰痘
瘡脉靜身涼者生脉躁身熱者死可見瘡疹亦用診矣故小兒七

歲以上四至為平脉七歲以下六至為平脉或云八至者非也大
抵小兒之脉多帶緊數王亟經云自然緊數甚分明都緣未散精
華氣又瘡毒之脉多浮大而數傷寒論云浮為風虛大為氣強風
氣相搏必成癰疹又云數脉不時則生惡瘡也脉六至也數如過
於本脉為大數邪氣實也不及本脉為遲則正氣虛也診脉之
法浮以候表沉以候裏浮而數表熱也浮而遲陽氣衰也沉而緊
裏熱也沉而細元氣脫也瘡疹之陽脉浮沉宜帶洪實弱而無力
為陽病見陰脉仲景曰陽病見陰脉者死九診得浮而無根腎虛
如羹上之肥數而急疾連來如雀之啄細而欲散緊如珠之絳
遲而欲絕滴如壘之漏沉而時見如魚之躍皆死脉也

○氣血

人之一身本乎榮衛衛者陽氣所以開闔闔者運動樞機者也榮者陰血所以充溢臟腑灌溉肢體者也故氣虛則神機息血虛則化源絕二者不可偏勝也痘疹之毒本於五臟之液各隨經絡部位直犯榮衛而出氣血從之觀其裏束堅厚窠囊充長者氣之足也根芽紅活形色潤澤者血之足也氣血既足則痘易發易靨不須施治以蹈實上之戒如平陷嫩薄者氣之病也乾枯之赤黑者血之病也責而治之不可因循以貽後悔然脾胃者氣血之父也心腎者氣血之母也肝肺者氣血之舍也脾納水谷其悍氣注於腎而為氣腎舍於肺而為衛以溫分肉充皮毛肥腠理司開闔也衛

氣虛則瘡不起發其毒乘氣之虛而入於肺肺受之則為陷伏而歸於腎矣脾納水谷其精氣注於心而為血心舍於肝而為榮以走九竅注六經朝百脉也榮血虛則瘡不光澤其毒乘血之虛而入於肝肝受之則為痒癩而歸於心矣凡治此者氣病治氣血病治血寒則溫之熱則清之虛則補之實則從之仍以脾胃為主不可犯之也

○陰陽

內經曰陰在內陽之守也陽在外陰之使也陰者血也陽者氣也難經曰氣以响之血以濡之言氣以行其血血以濡其氣也五瘡之出其浮沉聚散使於外者陽之德也灌注滋潤守於內者陰之

陽守乎陰陰使乎陽互為其用所以易發易收也若陰不
則陽不長而枯萎之變出焉陽不足則陰不生而陷伏之變出焉
必陰陽相濟毒化而解矣故治此者春夏養陽秋冬養陰辛甘發
散為陽酸苦涌泄為陰鹹味涌泄為陰淡味滲泄為陽陰病治陽
陽病治陰從陰引陽從陽引陰寒之而熱者取之陰熱之而寒者
取之陽形不足者溫之以氣陽也精不足者益之以味陰也是皆
素難之所秘能陰陽之理可以為人司命矣

○標本

病有標本治有後先有從標者有從本者有先標後本者有先本
後標者有標本兼治者視其急緩其法不同也痘瘡之候自入身

而言氣血為本瘡疹為標自瘡疹而言瘡疹為本別證為標如瘡
子稠密在標之病也視其氣之不勻血之不用以勻氣活血兼行
解毒此則標本兼治也瘡若起發氣或虛者補其氣血或虛者補
其血此緩則專治其本也氣血充實瘡或壅遏者單行托裏解毒
之劑此急則專治其標也瘡勢太甚咽喉腫痛者以治咽喉為主
此急則治其標也瘡勢太甚自利不止者以自利為主此急則治
其標也利久不止漸成壞瘡救裏發表兼而行之此亦標本兼治
也先救其裏後攻其表此則先標後本也大小便秘煩躁喘呼者
急利之此急則治其標也瘡勢太甚煩渴不止以解毒為主兼治
其渴此先本而後標也凡此之類橫而充之以盡其餘則治不

○形色

或云痘瘡之候無以脉診言形色可辨也謂之形者痘之形也故
尖圓堅厚始出之形發榮滋長欲壯之形飽滿充足成漿之形歛
束完固收靨之形與大豆豌豆莢豆相似者皆正形也或平或陷
形之變也如初出時空若蚕種之蛻隱如蚊蚤之迹薄如麩片密
如針頭若熱之瘰癧之粟者不能起發而死粘聚模糊肌肉虛浮
溶軟嫩薄皮膚潰爛者不能收靨而死謂之色者痘之色也喜鮮
明而惡昏暗喜潤澤而惡乾枯喜蒼膩而惡嬌嫩紅不欲淡上則
易破白不欲灰灰則難靨由紅而白白而黃黃而黑者此出形起

發成漿結痂之正也出形而帶紫起發而灰白此色之變能辨
疽之形色可知死生之期

○疎密

痘欲其疎疎則毒少不欲其密密則毒甚此古今確論也疎密之
分各有喜忌如頭面欲疎元首不可犯也頸項欲疎管齋不可塞
也胸背欲疎臟腑俞募之所附也若夫手足不忌其密矣謂之疎
者非但稀少也鋪排磊落大小勻淨亦可以言疎謂之密者非必
盛多也攢聚粘連片復亦片雖只數處一可以言密疎而凶者亦
有數等如初出時緣見紅點三兩處其熱便退可以語其疎也苟
大熱不解唇口燥裂大小便秘煩躁不寧或身無熱但增煩渴者

死時毒甚難過於中不能遽出日復漸出漸加稠密一也又如發
一兩點頂尖焦黑或三四粒作一堆者僅見數處他無所出喜
不食煩渴大小便澀此由毒伏於中加譫妄者不待起發而死
若能起發後必發癰毒也二也亦有出現實疎遂生玩忽之心禁
忌不守風寒不避飲食所傷湯丸之試變生不測三也設有密而
吉者治之早循之嚴裏無病而瘡悉成也

○輕重

痘有輕重輕者不須服藥但加保護而已重而未成壞瘡者可急
治之重而且壞不可治也何謂之輕者作三四次出大小不一
等根窠紅肥澤充滿頭面稀少眼中無喉舌無瘡能食大小便如

常此毒之輕也重者一齊出起發收壓如期能食此重之可治者
若頭面頸項胸背喉舌皆瘡稠密無縫或灰白色或青紫陷下或
外白裏黑或外黑裏赤食谷則噦飲水則噎或有利不止或大便
不通此重之不可治者也然有輕變重者以犯房室觸穢汚食生
冷冒風寒惑於鬼神誤投湯藥此人事之失也有重變輕者以避
風寒節飲食忌生冷遠人物醫不乖方此人事之得也吁本輕本
重者誘之於命變輕變重者非人所自致歟

○順逆

古人謂瘡疹春夏為順秋冬為逆春三月謂之發陳萬物以生夏
三月謂之蕃秀萬物以長得其時所以順也秋三月謂之容平草

冬三月謂之閉藏蟄虫坯戶違其時所以逆也此亦語其
長收藏之理豈有春夏皆順而吉秋冬皆逆而凶者乎如春生
長則春夏亦逆秋能養收冬能養藏則秋冬亦順也惟豆出一
般疎密得所不愆其期證之順也痘出夾雜帶斑帶疹稠密無縫
常失其期證之逆也意春夏為順秋冬為逆古人之言豈真拘上
於時令之說邪益春夏發生之令也秋冬殺伐之令也痘疹之出
起發者得春夏之令所以為順陷伏者得秋冬之令所以為逆其
斯之謂歟春膿泡金灶木夏黑陷水克火秋斑火克金冬疹土克水為之逆
者此不經之談黑陷一證四時不治何但在於夏邪故非其時而
有是證者氣血和平臟腑充實莫不皆順如其時而有是證者氣

衰血弱臟腑虛備者莫不皆逆

○痘有恠變

夫痘曰生癘者謂其變化莫測也若正而順者自然苗而秀也而實以成造化之功彼邪而逆則有許多恠變焉

一曰試痘初發熱兩三日面上報出紅點磊落稀疎十分可喜也不起發也不灌膿至五六日後都不見了其人面多青黑精神困倦再過兩三日後遍身發熱其痘一齊湧出善醫者能保其一二其實不可治者多矣

二曰痘母初發熱四五日後其痘不出或有背上或胸前忽然腫起一塊小者如盃大者如盤又有發熱二三日後面上遍身

毒盡出至起發時中間有痘瘡三五糊塗根脚頑硬但見此
多不可治

三日鬼痘發熱三日出痘又三日磊落稀疎十分可喜至起發時
痘頂作膿如菉豆色根脚紅圈戴艷至六七日後其瘡自破箇
箇深孔如錢鑿中心之狀必不可救又有一等起發之時忽有
瘡頂變黑拊之則痛者急以法救之以待傳開不可治矣

四曰爛痘初出之時十分可喜至於起發作膿之時自然潰爛破
損此病甚危

五日乾痘出形之後細密混雜如疹如疥皮膚乾燥瘡頭焦黑不
能起發而死

六曰空痘出見時好起發時好只到灌膿之時却不作膿一片空殼此證若不死必發癰毒大抵不可治者多矣

七曰生痘痘瘡之出即如枝頭之果以漸成熟今起發之時中心平陷再不滿頂至松作膿之時四圍紅紫猶是生血不化膿水其期已過不見成熟之色此證必死

○虛實

不知虛實者不可以為工經曰無虛上無實之虛實之分不可不知也經曰必先度其形之肥脊以調其氣之虛實此以形體別虛實也又曰穀盛氣盛穀虛氣虛此以飲食別虛實也又曰脉沉而實脉虛血虛此以血脉別虛實也又曰邪氣盛則實精氣奪則虛

以邪正別虛實也大抵實者邪氣實也虛者正氣虛也經曰邪之所湊其氣必虛而不去其邪實是也又云五實死者謂邪氣之實也五虛死者謂正氣之虛也凡人身之證其人身體肥健飲食能多六脉洪實素無疾病大便如常瘡色紅潤者此表裏正氣俱實也不須服藥若形軀羸怯素多疾病飲食減少六脉微弱吐利頻上瘡色淡嫩者此表裏正氣俱虛也陳氏溫補之法可用如瘡勢太盛掀腫痛脹大熱不退煩渴昏睡大小便秘此表裏邪氣俱實也錢氏涼瀉之法可用如瘡本稠密掀發紅活吐利不食者此表實裏虛也於補湯中加解毒藥如瘡色淡白發不透滿大小便秘渴飲大嘔者此裏實表虛也於解利中加發藥又如瘡

痛者邪氣實也當活血以開其鬱若痛如刀刺悶亂大呌者勿治
瘡痒者正氣虛也當補氣以燥其濕如爬搔不定破爛皮脫者勿
治灰白者氣虛也參耆之功為大乾燥者血虛也歸芎之力宜多
虛則補之實則瀉之中病即已無過其制此治之權衡也若本實
而反瀉之則毒氣彌盛或為潰爛或為癰腫或為目病或為咽瘡
或為失血皆補之過也如本虛而反瀉之則正氣益虛或為吐瀉
利為厥逆皆瀉之過也經云毋致邪毋失正絕人長命其此之謂
歟

○動靜

凡物得其平則靜失其平則動經曰陽氣者靜則養神柔則養筋

又曰陰氣者靜則神藏躁則消亡夫患痘者陰陽俱病息欲其
語欲其少寐欲其定寤欲其寧饑則索食渴則少飲觸其瘡則吟
拂其欲則鳴此平人之候神清氣定謂之靜而吉也如呻者身有
苦也自語者神不清也喘粗者內熱也腸鳴者洩也坐卧不定者
心煩也啼叫不止者痛也搖頭者風也指欲搔者痒也嚥物難者
咽痛也咬牙者心肝熱也若悶亂躁擾譫妄昏眩如見鬼狀搖頭
扭項手舞足擲目睛上翻寒戰咬牙語音不出則皆死候矣如病
向靜忽作擾動者異也以法求之如瘡色變無他候者此戾氣所
觸也如瘡色不變又無他證此必有因但俟自定其有目瞋息微
四肢僵直口禁瘡壞昏睡不醒者此真氣將脫魂魄欲離之兆又

不可作靜診也

○痛痒

諸痛為實諸痒為虛謂之實者邪氣實也謂之虛者正氣虛也又
瘡疹為火火盛則痛火微則痒故常作痛者此邪氣之實也蓋痘
瘡之毒發於皮膚肌肉之間氣以束之血以潤之醞釀其毒以抵
於化正氣周旋而不含毒氣變化而未成鬱而作痛此其常也毒
化膿成其痛自止若肉如刀剗膚如錐刺一向痛而不止大叫
哭此則皮傷肉敗不勝其毒又痛之變也常作痒者此正氣之虛
也經曰胃者水穀之海六府之大原也五味入口藏於胃以養五
臟胃氣既虛則水穀不化津液內竭不能輸精於皮毛氣失其衛

血失其榮不能醞釀毒氣以至於成使毒氣浮沉隱伏聚散條忽
灼於皮毛所以痒也此其為異補其氣血和中托裏其痒必止若
一向瘙痒時甚一時爬抓破壞皮脫肉坑者此毒氣內陷正氣外
脫不旋踵而告變矣如先期後痒此常候也蓋先則毒未解化其
火正盛宜爾作痛厥後膿成毒解火氣漸微宜爾作痒也

○老嫩

譬觀朝華之草夕而零落松柏之堅凌冬不凋夫以草木堅脆不
同堅者難壞脆者易傷况於人質有厚薄氣有強弱耶彼瘡疽之
毒喜老而惡嫩蒼臙嬌紅色之老嫩也緊實虛浮形之老嫩也濃
濁清淡漿之老嫩也堅厚軟薄痂之老嫩也老嫩之故衛氣主之

經曰衛氣者所以溫分肉充皮膚腠理司開闔者也。是故衛氣強則分肉堅皮膚厚腠理密而開闔得也。所以收斂禁束制其毒而使不得以放肆故色蒼而腠形緊而實漿濃而濁加厚而堅自然易壯易醫雖有邪風穢毒弗能害也。如衛氣弱則分肉脆皮膚薄腠理疎而開闔失也。所以不勝其毒而毒得以恣其猖狂之性故色嬌而紅形虛而浮漿清而淡加軟而薄易破難醫不待邪風穢氣而先敗壞矣。觀夫瘡之老嫩則氣不可不養也。

○榮枯

夫物濕則潤澤燥則乾枯榮枯之分血實主之故血者所以榮陰陽濡皮毛流關節也。瘡本疎者血不在多而易充足瘡本稠者貴

乎血之有餘矣苟血有餘則經脉流行淪於肌膚寒於皮色蒼既
濕潤肥澤長養自然形色鮮明根葉紅活也如血不足則經脉壅
遏寒囊空虛黑燥而不鮮明也枯萎而不肥澤也皮膚皴揭而啓
裂也經曰諸澁枯涸乾勁皴揭皆屬於燥又曰燥勝則乾由其人
血常不足加之以毒火薰灼反無燥金之化精血並竭是以有此
證也法宜活血養液散熱解毒清金潤燥則乾涸可回觀夫瘡之
榮枯而得養血之理其或溫氣太過瘡本浸淫犯之則破潰爛難
瘳者此又火極而蕪水化也脾強則生脾弱則死

○善惡

夫良工者必知瘡之善惡善則就之惡則去之瘡疽之證有五善

有七惡五善者飲食如常一善也大小便調二善也瘡紅活堅實三善也脉靜身涼手足和煖四善也語聲清亮動止安寧五善也五善之證不能悉具但得一二自然清吉七惡者煩躁悶亂譫妄恍惚者一惡也嘔哕洩利飲食不化者二惡也瘡青乾黑陷痒腐破爛者三惡也頭面預腫鼻塞目閉唇裂者四惡也喉舌潰爛食入則碗水入則噓者五惡也寒戰咬牙聲啞色黯者六惡也腹脹喘促四肢逆冷者七惡也七惡之中但見一證勢不可為七惡之外復有渾身血泡心腹刺痛陷伏不出便溺皆血尋衣撮空者是又卒死之候也

○始終

治瘧之法貴乎謹之於始而慮其所終庶無後日之悔經曰上工治未病中工治將病下工治已病未病施治十全八九治將病者十全四五治已病者功莫能施發熱之初大熱渴煩大便秘腹痛腰痛鼻乾唇燥驚悸譫妄此毒氣鬱遏於內即當防其伏而不出也吐利不止即防其中氣虛弱不能助瘡成就或致倒陷也故熱則解之便秘則利之驚則平之吐利則止之且如初出一點血此春之氣發生之令也至於起發此夏之氣長養之令也水化為漿此秋之氣成實之令也膿血結鑿此冬之氣閉藏之令也初出而便有水將發而便戴漿膿未成而便收鑿此未至而至謂之太過必有陷伏發表托裏解毒切不可緩應出不出應起不起應收不

收此至而不至謂之不及必責以氣衰血微而勻氣活血解毒之法不可不急施也又如初出色艷者皮嫩皮嫩則易破當防其痒痛也相聚成塊者不可謂之疎此有伏也殼空無水者後必發癰腫面預腫者防其易消而倒陷咽痛者急解之防其失聲瘡喉也中多水泡者後必自利目澁淚出者防其有翳翳也頻更衣者其倒靨瘡破不結痂此倒靨也堯夫云與其病後總服藥孰若病前能自防其此之謂歟

痘疹發熱要論卷之三

○發熱

瘡疹發熱與傷寒相似但傷寒只見一經形證若瘡疹則面燥腮赤呵欠頭悶乍涼乍熱多睡欬嗽噴嚏驚悸吐利手足稍冷戰涼耳涼也然發熱者瘡疹常候也不可盡除之但熱微毒亦微熱甚毒亦甚

○初發熱時精神清癸唇鼻滋潤更無他證者此熱在表其瘡必疎不須施治

○初發熱時渾身壯熱熾上然不渴清便自調此邪在表拂鬱於皮膚之間宜以輕揚之劑發之升麻葛根湯主之一甚則羌活

湯主之十

○初發熱時其熱烙手目赤鼻乾唇燥小便赤大便秘煩悶不安此表裏俱熱毒氣壅遏宜發表攻裏雙解散主之四

○初發熱時表不大熱其人煩躁不安此熱在裏也以三黃丸微利之八

○初發熱時腹中痛者此毒氣與穀氣相併宜利之去陳莩蒸使毒氣得洩穀氣得消備急丸主之九

○初發熱時咳嗽吐著參蘇飲主之三

○初發熱時或乘疫癘之氣人參敗毒散主之二

○初發熱時或為風寒所襲出不快者桂枝葛根湯五雙解散四

去大黃主之

○如瘡既出其熱便退瘡本必疎若一向熱不衰者此瘡必密是解其毒連喬升麻湯六代天宣化丸十二主之

○如瘡已出但微發熱不須治之蓋瘡疹屬火非熱不能成就也
○如瘡漿膿已成毒氣已盡又復發熱者俗呼為乾漿者是也不須施治

○如結痂之後其熱不壞者此邪氣未盡正氣未復熱微者不須治之熱甚者當視其虛實

○渴

瘡疹渴者裏熱也益三焦者水穀之道路津液者水穀之精華也

化流行以灌溉乎三焦也瘡疹之火起之於內銷燦水穀不得以
變化津液灌漑臟腑故渴也又瘡本稠密津液外洩化為膿漿不
能滋養真氣亦渴也小渴者常病也不須治之大渴者視其虛實
以法治之切不可冷水亂投梨橘西瓜等物與之恐損脾胃致
生災異也

○如發熱時便大渴者此熱在裏也葛根解毒湯 二十一 主之

○如瘡已出或起發或收斂一向渴不止者人參麥門冬散 二十

主之

○如能食而渴者肺熱也經曰心移熱於肺傳為膈消由心火上
炎乘於肺金薰蒸焦隔耗津液故渴也治在上焦人參白朮

湯二十四加黃連

○如不能食而渴者脾虛也叔和云口乾饒飲水多食亦飢虛由脾素弱不能為胃行其津液故渴也治在中焦參苓白朮散二

十三主之

○如自利而渴邪傳腎也正理論云自利而渴者屬少陰虛故引水自救蓋腎主五液其脉絡於肺繫舌本邪傳於腎則開闔不司故自利自利則津液不走腎水乾不能上潤於舌故大渴也治在下焦宜溫之陳氏異攻散二十六主之

○如渴而大便秘者宜利之四順清涼飲二十七主之

○腰痛

瘡疹發熱先腰痛者最宜忌之經曰腰者腎之府也又曰太陽所至為腰痛蓋足太陽膀胱經為十二經之首其脉俠脊入循膂絡腎瘡疹之毒起於右腎之下循足太陽膀胱散於諸經乃邪由裏傳表也如初發熱其腰即痛此邪由膀胱直入於腎故關節不利而腰痛亟解毒以瀉少陰之邪發表以通太陽之經使邪氣不得以深入瘡雖稠密或可愈也治若少緩則太陽之邪由表以傳於陽少陰之邪由裏以傳於陰表裏受病陰陽俱傷榮衛之脉不行臟腑之氣皆絕或為黑陷或為痒溺終莫能救

凡發熱便腰痛者先服人參則毒散二次服五苓散加獨活主

一〇腹痛

內經腹痛者屬於寒惟有一證為熱瘡疹腹痛皆屬毒熱也訣云發熱肚中痛斑瘡腹內攻發多防不透發少更防癰是已或有食食積者

○如初發熱便腹痛者此毒氣內攻須急治之不可逡巡以貽後悔便調者四君子湯二十去白朮加青皮木香山楂肉枳殼便秘二三日未行者承氣湯三十主之

○如發熱腹痛大渴煩躁大便秘狂妄者三乙承氣湯三十主之

○如發熱腹痛大便如常者化毒湯主之三十二

○如發熱腹痛大便自利者黃耆建中湯主之三十一

○如瘡已出至收靨時原無腹痛忽然作痛此必有飲食也消息
審問曾因飲冷水者五苓散主之二十八或用黃耆建中湯加

白朮乾姜人參

三十一

曾傷食者問傷何物丁香脾積丸主之

三十三

用原物湯送下

○如瘡已出至收靨原無腹痛忽然作痛亦未傷飲食但觀其太
便何如若便秘者此燥屎也以三黃丸微利之大便自利者
此虛痛也黃耆建中湯三十一主之

○如因寒而痛者理中湯

三十四

加白芍藥桂主之

○如發熱時心腹絞痛煩悶呌呼或瘡陷伏脹滿疼痛喘促者此
惡毒之氣攻刺腸胃燔灼臟腑必不可治

○驚狂

驚者口眼喎邪手足搐搦隨發隨止狂者手足擾亂言語乖越發而不止驚者心主火而惡熱肝主風而善動瘡疹之火內生於心移熱於肝風火相搏故發為驚搐也此其常候俗呼驚痘最吉者以牽引伸縮骨節開張腠理疎解中存發散之義瘡出而驚即止若一何發而不已此則可惡乃毒內伏於心故耳狂者心為火而主神腎為水而主志火起於內濁亂擾動心神不守腎志不寧故發為狂也亦有大便秘鞭而狂者此謂有燥屎為陽明病但數日不更衣是以難經所謂重陽者狂也如昏不知人起卧不定又為不治之證

○如初發熱驚搐者導赤散三十五加辰砂蕪荖活湯主之十若

發不休小便利者可治小便不利者難痊以導赤散三十五牛

黃清心丸三十六相蕪治之

○如瘡疹收靨之後又發驚者此真氣虛弱火邪內攻宜急治之

恐久成癰以貽終身之害寧神湯三十九抱龍丸四十主之

○如初發熱大便自調狂亂者五苓散二十八加辰砂主之

○如大便秘者輕則三黃丸八甚則承氣湯三十主之

○譫妄

譫多言也妄虛妄也譫妄者妄有見聞而語言無倫也皆邪氣熾

盛正氣虛弱神識不清之所致夫言為心聲心熱則多言睡中

○熱之微也寤而語言差謬熱則甚矣亦有胃熱而譫語者大便必鞭數日不更衣方是安有聞見而譫語者其候難治蓋腎主志開竅於耳在目為瞳子毒邪入腎則志喪志喪則耳目妄有聞見故曰失志者死難經云脫陽者見鬼

○初發熱時譫語者此毒邪犯心心為熱胃其神浮越宜瀉火鎮神導赤散 三十五 牛黃清心丸 三十六 煎而治之

○如胃中有燥屎三五日未更衣者宜滌腸解毒宜四順清涼飲 二十七 三黃丸 八 主之

○如起發成漿欲腐之時忽然神昏譫語此由瘡本稠密精血外耗不能養神宜養血瀉火安神丸 四十七 主之

如昏不知人語言無倫者死經曰衣被不歛言語不避親疎者神明之亂也故不可治

如初發熱便妄有聞見狀如見鬼而恐怖者不治此證自始至終皆不可有乃神志俱喪軀殼徒存不過引日而已

○吐利

瘡疹吐利常候也經曰諸嘔吐暴注皆屬於熱蓋三焦為水穀傳化之道路熱火內迫則傳化失常而吐利併作火性燥動迅欲故也邪在上焦但吐而不利邪在下焦但利而不吐邪在中焦則上吐下利又裏氣上逆而不下則吐氣下而不上則利瘡疹初發之時有吐利者不可驟止令邪氣上下得出也吐利久不止方可治

之更宜消息

○如初發熱自利青綠水或黃色者皆熱也黃芩湯主之 四十一

兼吐者黃芩加半夏湯主之 四十二 不可誤用理中湯又增內

熱也

○如初發熱自利一日夜只三四行者此不必治痘出利自止矣

○如初發熱自利清白色者此裏有寒也理中湯 二十四 主之

○如自利久不止此有濕也宜分利小便固澁腸胃恐虛裏氣致

生陷伏也以五苓散 二十八 豆蔻丸 四十三 相兼治之

○如初發熱暴吐不止此火氣上逆也柴連散 四十八 主之

○嘔吐噦

仲景云聲物無出為嘔物獨出為吐聲獨出為乾嘔乾猶空也明其無物也然乾嘔與噦皆聲之獨出者乾嘔其聲輕小而短噦其聲重大而長嘔吐噦噦最惡候也蓋胃為水穀之海上通乎膈內而不出如初發熱有是證此火邪犯胃其氣上逆治之則易條若自出現以致收靨有是證者乃瘡集於咽門攻於胃脘吞噦不利治之則難由於不知預解咽喉之法漸變為失音噎水而不可救矣

○如因飲水過多而嘔吐者此水逆也五苓散二十八主之

○如因傷食而嘔吐者以丁香脾積丸微利之 三十三

○如無上證而嘔噦者人以胃氣為本胃者土也土敗則水來侮

之今木挾相火之勢上乘乎胃其氣自騰下直犯清道出於
實門口也微則乾嘔甚則噦土敗之象也太素曰絃絕者其聲
嘶敗木陳者其葉落病深者其聲噦短針無取毒藥無攻謂不
治也

○洩利

凡瘡未出而利者邪氣併於裏腸胃熱甚而傳化失常也治見上文瘡
已出而利者邪氣併於表正氣方逐邪氣主乎表而不主裏則裏
氣虛不能停納水穀故亦自利也宜從氣虛而治瘡疹所忌內虛
泄瀉凡覺腹疼或瀉上響趨小腹者皆欲作利宜先以法治之治
之不止此開腸洞洩惟瀝劑可以收之聖濟經曰滑則氣脫欲其

收者是已如服瀉劑而利不止經曰倉廩不藏者是門戶不要也
金匱要略曰六府氣絕於外者手足寒五臟氣絕於內者利不止
五奪之中此為最甚但正氣內脫者淹延而死邪氣內陷者煩渴
而死此為異耳

○自起發以至收醫大便常宜堅實忽然自利者理中湯丸三十四
主之

○如因飲冷水自利者所謂濕勝則濡泄也宜溫中利小便以理
中丸三十四理中氣勝水寒五苓散二十八利小便去水也

○如因傷食自利者所出必酸臭乃飲食自倍腸胃乃傷也宜先
去其積丁香脾積丸三十二後補脾胃益黃散四十五主之

○如利不止先服陳氏木香散

四十五

蕪豆蔻丸主之

四十六

更甚者陳氏異攻散主之

二十六

此藥太峻不可猛浪

○如結痂之時暴泄不止者消息所出之物痂皮膿血者順水穀
不分者逆如利膿血不止者此熱毒下流也香連丸主之

五十

○大小便秘

凡病瘡疹者小便欲其流而長大便欲其潤而實則邪氣不伏正
氣不病經曰小便數者大便必鞭雖二三日不更衣無苦也如竟
小水少則病增進蓋心主瘡而屬火心移熱於小腸小腸移熱於
膀胱膀胱為津液之府氣化則出氣為火食不能傳化而津液不
出故小便秘也瘡疹發熱大便欲潤若二三日不行宜急利之恐

腸胃不通榮衛不行瘡出轉密也惟瘡起發之後大便却宜堅實如能食而大便常行者不須忌之若過四五日不行則熱盛生濕其毒難靨亦宜微利之設使大小便俱不通則邪毒內畜三焦阻絕經曰一息不運則機絀窮故大小便不通者死

○凡瘡疹小便少者熱微導赤散三十五加山梔仁熱甚八正散主之四十六

○如發熱時大便不行熱微者三黃丸八甚則承氣湯主之三十

○如起發至收靨大便不行者用膽導法五十一不可遽用利藥

○但瘡乾黑陷大便便秘煩躁者以百祥丸五十二牛李膏五十三

主之如無此藥以承氣湯代之三十

○欬嗽

肺主氣其變動為欬欬者肺證也瘡疹發熱之物便有欬嗽有肺為五臟之華蓋瘡疹之火挾君相二火之勢上薰乎肺肺氣焦舉故氣逆而欬也瘡疹既出其欬更增者此喉嚨有瘡淫淫如痒言言如梗故欬也瘡疹收後而欬者此衛氣虛弱腠理疎開風寒外襲肺氣逆而不收故亦欬也

如初發熱欬嗽甚者先以參蘇飲發之三次以甘桔湯七合溫

白散

五十四

加牛旁子治之

如瘡已出欬甚者甘桔湯七加牛旁子主之

如瘡光壯收靨身熱欬甚者人參清肺散主之六十一

如瘡已靨欬嗽者不問形寒飲冷所致宜人參清膈散主之十六
如斑瘡欬嗽身熱而渴者生地黃散主之五十九

○喘急

諸喘皆屬於火肺者藏之長也為心華蓋心火炎上則肺焦葉舉
氣逆不利而喘也有因風寒而喘者有因傷食而喘者惟瘡疹之
喘獨屬於火若加洩利腹脹煩躁則不可治

如初發熱便喘者前胡枳殼湯主之五十六大便秘者可用服
此不止以亭蔞丸治之五十五

如喘而大便自利者黃芩湯四十一加五味子人參主之

如瘡正盛忽然喘急者此惡候也當詳審如因傷食穀氣鬱而

為熱上乘於肺作喘者宜利之丁香脾積丸主之三十三
熱除喘自定也

如因感冒風寒而喘者麻黃湯主之

六十七

如泄瀉內重腹脹而喘者陳氏木香散主之二十五
利止喘定

者生滑利不禁喘滿增盛者此氣脫候也

如瘡內伏不出或已出復陷腹脹悶亂而喘者必死

○自汗

自汗者不因發散而自然汗出也衛氣者衛護皮膚肥實腠理禁固津液使不得妄洩也瘡疹之火由裏達表干於衛氣皮膚薄之緩腠理為之疎津液外洩故自汗也凡病自汗不宜遽止之瘡疹

自汗實為美證乃陰陽氣和榮衛通暢邪氣不留易出而解也又
心主汗諸瘡皆屬於心有汗出者毒氣外洩也雖然熱之甚者亦
為汗解身復清涼此毒散也若汗出不止其熱反劇此邪氣併於
陽而陽虛宜歛汗固表清熱解毒使衛氣充實無痒蕩潰爛之患
如瘡已收較痂皮脫落自汗者此氣虛也宜補陽救陰使氣無洩
竊中汗出心有熱也其汗上至頭下至頸不過胸者乃大陽虛汗
也不須治之上至頸下至臑者此胃虛也手足皸皸者胃熱也宜
止之如汗出如油髮潤如洗喘不休者此為肺絕之候

如汗大出不止身壯熱者當歸六黃湯主之

六十八

如瘡收後汗出不止者十全大補湯主之

三十八

若更不止謂

敗蒲散七十同服外用溫粉撲法六十九

胃虛自汗者調元湯十八不止調敗蒲散七十同服

胃熱手足自汗多者人參白虎湯二十四加黃連主之

○失血

氣為陽血為陰陽主動陰主靜人身之血不可妄動也經曰陽絡傷則血外溢血外溢則衄血陰絡傷則血內溢血內溢則後血全瘡疹之火薰灼於裏迫血妄行血亦隨火而動陽絡傷則血從上焦出或衄血或嘔血陰絡傷則血從下焦出或溺血或便血陰陽俱傷則血上下出也諸失血惟從鼻出者或有可治之理其餘皆死證也亦有痘瘡灌爛不能收較出血不止者此陽瘡出血亦不

可治

凡瘡疹衄血內熱也玄參地黃湯主之
六十五
衄止者佳一向
不止者勿治

○煩躁

煩者擾擾而煩躁者憤躁之躁合而言之煩躁皆熱也析而分之
煩陽也熱之輕者躁陰也熱之甚者難知集曰火入於肺煩也火
入於腎躁也瘡疹煩躁須宜忌之若吐利厥逆腹脹喘促而煩躁
者昏不知人譫妄狂擾而煩躁者謂之悶亂皆不治之證

如肺熱而煩者坐卧不安審於何時若初發熱便煩者此毒火
內鬱人參白虎湯
二十四
加梔子仁主之若瘡發見猶煩者此

毒伏於內未盡出也消毒飲

十六

奪命丹

十七

合而服之若瘥

出盡又已起發猶煩者此內熱也牛黃清心丸主之

三十六

○如腎熱而躁者必曾自利輕則陳氏木香散

二十五

甚則陳氏

異攻散

三十六

主之

○如揚手擲足欲出衣被者此熱甚於表也羌活湯主之

十

○如神識昏迷反覆顛倒者此熱甚於裏也導赤散

三十五

牛黃

清心丸

三十六

合而治之龍腦膏甚妙

○吐利不食而煩躁者正氣虛也陳氏木香散

二十五

主之

○如六七日不大便腹滿而煩者此內實有燥屎也輕則用三黃

丸

微利之甚則承氣湯

三十

下之

如晝日煩躁夜則安靜者此陽甚於晝至夜則陽氣退而安靜也人參白虎湯加梔子仁主之 二十四

如晝日明了夜則煩躁者此陽陷入於陰夜則陰盛陰陽交爭故煩躁也四物 十九 加梔子仁主之

○夾疹

疹一名麻子君火神為也

或曰脾為疹

經曰少陰所至為瘍疹在人則

心火主之夫心火亢甚則制已所勝焚灼肺金肺主皮毛故疹毒

見於皮膚之間如蚊蚤所咬之狀瘡痘只出一般者善若與疹毒

並出謂之夾疹其候極惡惟痘本稀疎而夾疹者庶乎可治瘡本

稠密與疹並出彼此相混瑣碎莫辨急用辛涼之藥發而解之如

疹毒漸消瘡本磊落者亦可治也疹痘相併毒不少減此危惡之疾孰能料其生乎

瘡出夾疹者荆防敗毒散主之七十一疹毒消者可治如瘡收靨後復出疹者此餘毒解散之兆不須治之

○夾斑

活人書云傷寒下之太早熱氣乘虛入胃發斑下之太遲熱留胃中發斑胃爛亦發斑斑者乃熱毒鬱遏煎熬陰血血得熱而不解浮於肌肉為斑足陽明胃主之痘瘡初出皮肉紅腫片片如錦紋者此夾斑也以辛涼之藥解之其斑漸退瘡本堅實者吉否則皮膚斑爛瘡易癢痒所謂皮嫩易破者是也如赤斑成塊其肉浮腫

結硬者又名丹癰其毒最酷瘡未成就此先潰爛工不可治

瘡出夾斑者荆防敗毒散主之

七十一

斑退可治

○痘疔

痘疔者執毒畜積氣血腐壞而成也狀有數種乃疫毒之氣最為
惡候宜謹察之有肌肉微腫狀如堆粟不分顆粒者此氣滯血凝
毒氣鬱結也有初出紅點漸變黑色其硬如石者此肌肉已敗氣
血中虛不能載毒而出反致陷伏也有中心黑陷四畔突起者此
者此血隨毒走氣不為用也有中心戴漿四畔乾陷焦黑者此氣
附毒出血不為便也有頭戴白漿自破潰爛者此氣血不充皮膚
敗壞也有為水泡溶溶易破者此大濕併行氣虛不能斂聚也有

為血泡色紫妨破者此血熱妄行不能自附於氣也有瘡頭針孔
漿水自出者此衛氣已敗其液外脫也此數證者於五六日間候
之但見一證即不可治

凡痘疹起發之時但見乾燥其根焦黑者即內服奪命丹_{十七}
外用四聖散_{七十二}塗之

如原有瘡疥或灌瘡未愈或瘡將較癰嫩者至痘出之時其處
痘本攢聚形色黑潰急以針刺破之先去毒血外以四聖散_七

二塗之內服加味四聖散_{六十四}調無價散_{七十三}併奪命丹

七十主之

如瘡焦黑渾身皆是者看大便何如若大便秘者內服承氣湯

三十調無價散

七十三

外用水楊湯浴法

七十五

大便利者內

服十全大補湯

三十八

陳氏木香散

二十五

調無價散

七十三

合奪命丹

十七

外用水楊湯浴法

七十五

○痘癩

痘癩者熱毒拂鬱氣血虛弱肌肉敗壞經云熱勝則肉腐者是也
正理論曰脉浮而大為風虛大為氣強風氣相搏必成癰疹身體
為痒痒者名為泄風久久為大癩凡氣血充實者外無虛風內無
強邪必無是病惟氣血素虛者不能榮衛於身易感天地肅殺之
氣皮肉之內虛風居之蒸以痘疹疫癘惡氣擊搏燔灼流散四布
隨空而出所以瘡本稠密身無完膚癰痒難任肌肉潰爛而痘癩

成矣急用大補氣血清熱解毒之法庶可求全若待敗面爛鼻
崩目盲肢體殘傷不至殞命亦為廢人矣

凡瘡破成癰者用十全大補湯三十八苦參丸七十七合而服
之外用滅癰救苦散塗之七十八

○痒瘍

訣云虛則痒實則痛此大聖言之痘瘡之痒其候不同有方出而
身痒者初見紅點遍身作痒此邪氣欲出皮膚閉密其火將移徙
來故痒也與傷寒太陽經病身痒者同論可發之使皮膚縱緩
理間通邪氣得洩瘡出而痒去所謂火鬱則發之者是已有將收
較而痒者其膿已成其瘡將回邪氣散而正氣復榮衛和暢故痒

也與癰癤將痊而痒者同論不須服藥但謹護之勿令搔搦以致
腫灌所謂美疾者是已有起壯泡漿而痒者當血已化水水未成
腫之時其毒未化渾身瘙痒爬搔不寧此惡候也與傷寒陽明經
病皮中如虫行者同論所謂廔風外搏邪氣內強痒而不止為泄
風者是已此視瘡之乾濕以風藥佐之必令痒去方為佳兆若痒
甚不休瘡壞皮脫其毒復陷謂之痒瘍必不能治矣大抵出形而
皮肉紅艷起發而皮嫩多水者其後常致痒瘍也

○如初出身痒者可發之桂枝葛根湯五加制麻黃牛旁子主之
○如起發養漿而痒者通用十全大補湯三十八加防風牛旁子

主之

○如瘡乾而痒者宜養血潤燥以四物湯十九合消風化毒湯八

十二奪命丹十七主之外用茵陳薰法八十一

○如瘡濕而痒者宜養氣去濕以四君子湯二十合消風化毒湯

八十二奪命丹十七主之外用茵陳薰法八十一

○如瘡痒潰爛粘衣被席難任者以十全大補湯三十八加防風

合奪命丹十七主之外用敗草散八十

○如瘡將收而作痒誤犯破損不肯乾較者用白龍散貼傳七十

○陷伏

伏者毒畜於裏而不以也陷者毒出而復陷入也此皆惡候伏惟

一證陷有數種伏候於見形之時其人瘡出熱不少減煩渴悶躁

此有伏毒未得盡出也。陷則見形之後，其血漸乾而變黑者，謂之黑陷。漿水未成，破損痒癢者，謂之倒陷。膿成復化爲水，不肯結痂者，謂之倒靨。亦陷類也。其瘡黑色，皆謂之黑陷。凡斑疹黑色，皆不治之以腎爲水，其色黑乃腎之真臟色見也。粗工不知變黑歸腎之理，妄謂腎不可實，欲瀉腎而使之虛，不知人之一身大言陰與陽，小言心與腎，即方家所謂真水真火也。瘡疹之火發於中，賴此一點真水以制其亢。苟欲瀉之，則火無所制，本先撥矣。豈治之要哉？然謂歸腎者以腎主骨髓，又主閉藏也，蓋瘡疹穢毒由骨髓逆於筋肉皮毛之間，乃自內而外。其毒得洩，今旣陷伏，則自外而復入於內，藏於骨髓，謂之歸腎也。又初出形之時，春氣發生之令也。

形而黑是春行冬令矣起壯之時夏氣長養之令也起衰而黑是夏行冬令矣養聚之時秋氣成實之令也膿乾而黑是秋行冬令矣故皆謂之逆結疔之時冬氣閉藏之令也此腎之正候若未著加膿水浸潤此冬行春夏之令亦謂之逆惟知造化之機可以語婦腎之說其色黑者火化也觀物之乾者其色黑出於大者色亦黑豈可謂之水乎經曰火發而曠昧知此可以語黑陷矣

○凡瘡伏而不出者雙解散主之四

○如倒陷者看其六腑何如大小便秘四順清涼飲 二十七 合奪

命丹主之 十七 泄利氣弱者十全大補湯 三十八 合奪命丹主

之 十七 並外用胡荽酒 七十四 水楊湯 七十五

○如將起發瘡亦有水但色黑黯者以十全大補湯三十八調無

價散

七十三

主之或以快斑湯

十五

奪命丹

十七

合而服之

○如倒靨者亦視其大便何如大便秘宜利之三黃丸八四順清

涼飲

二十七

泄利者宜補之輕則十全大補湯

三十八

甚則陳

氏木香散

二十五

並外用敗草散

八十

主之

○癰腫

經曰熱勝則腫大抵毒之盛者必腫毒微者不腫凡瘡出盡應期起發頭面以漸浮腫者此毒火發起聚於三陽之分欲作膿血故宜皮肉掀腫也設當起發之時頭面不腫者必瘡本磊落毒氣輕淺雖爾作膿根不占處所以不腫不須治之如瘡本模糊起發不

此毒伏於內不即發洩不可以毒輕論也如起發腫大皮肉
如常瘡尖而圓粒上分明者此佳兆也若皮色鮮紅瘡未成常粘
聚平塌者若瘡色灰白成餅如錫面者若瘡焦紫無水者皆凶兆
也有先起發頭面預腫者此蕪疫毒之氣名大頭瘟者是也腮頰
預腫者此名蝦蟆瘟也須蕪疫氣而治多凶少吉大凡瘡腫者至
至乾漿經痂之時毒化而腫消矣故應腫不腫應消不消者謹防
防之

凡瘡腫脹面浮目閉者急與解毒護目救咽喉相蕪治之內用
消毒化斑湯八十四外用神應膏六十六護目

凡瘡腫脹切防癰瘻正面之中不可少有破損者苟生瘳破沙

崩之勢漸不可為邪氣內陷真氣外洩腫消而死矣但得破者復灌消者復腫飲食如常大小便自調者變凶為吉用十全大補湯三十八苦參丸七十七合而治之

○如瘡色灰白面腫如錫餅者但看其人臟腑何如若能食大便調小便長無他苦者多吉若不能食吐利併作或生癢痒者多凶

○如頭面預腫或腮頰預腫者此時行疫毒也並用羌活救苦湯主之八十三

○潰爛

痘瘡所貴者堅實不破員淨成痂也其有潰爛者火勝也經曰熱

勝則肉腐火之為用猛雲陰暴近之則燥痒不寧迫之則焦腐難
忍灼之則糜爛成瘡故敗物者莫如火也火生於空非靈不然來
之以風其燄益烈痘瘡潰爛由肌肉素虛邪風侵襲風者善行數
變行諸脉俞散於榮衛之間一旦毒發於裏風應於表風火相扇
肌肉憤臍皮膚決裂而瘡壞矣如膿成而潰則毒已化但粘衣漬
席不能乾較古方以敗草散主之誠良法也膿未成其毒未化
痒破潰爛者則衛氣暴洩津液不榮譬諸草木剝削其皮枯萎而
死矣經曰根於中者命曰神機神去則機息根於外者命曰氣立
氣止則化絕此之謂也

○厥逆

逆者四肢逆而不溫也厥者冷也又甚於逆四肢者諸陽之本常
宜和煖如指頭微寒者陽氣衰也陽氣起於足心十指之端足心冷者陰氣勝也
陰脉集於足下而起於足心如瘡焦黑煩渴煩悶喘促而厥逆者此陽毒內陷
熱氣逆伏手足為之冷所謂熱深厥亦深火極似水者如瘡本灰
白泄利而厥逆者此元氣虛憊陰陽不相順接而手足為之冷也
瘡疹之候頭常欲涼足常欲溫故頭溫足冷者不治厥逆乃瘡家
惡證也

如因熱深而厥者大便不通三乙承氣湯主之三十瘡黑者百

祥丸

五十二

牛李膏主之

五十三

如因泄利氣虛而厥者陳氏木香散

二十五

異攻散

二十

主之

○但十指頭微寒者四君子湯二十理中湯三十四並加桂主之
○如瘡始出手足便冷者其人先有吐利四肢者皆稟氣於胃脾
胃氣弱不得至經理中湯三十四加桂主之

○寒戰咬牙

戰者森然若寒振振然搖動也咬牙者上下片牙相磨而鳴也經
曰諸風振掉皆屬肝木寒戰而振振搖動風之象也火氣沖物亦
然錢氏曰肝主風虛則咬牙多次又曰上竅咬牙心熱也然則寒
戰咬牙心肝二臟主之或以寒戰為氣虛咬牙為血虛或以咬牙
為齒稿謂津液不足者皆不知此意痘疹所惡者寒戰咬牙或單
見一證或二證並見若瘡已壞加之喘促悶亂者死無日矣

○如瘡初出而寒戰者此邪氣將出外與正爭故振振搖動火之
象也瘡出乃定柴胡桂枝湯主之 八十五

○如瘡本稠密掀發腫痛經脉動搖時時振動者不可謂之寒戰
待膿成痛去而解

○有筋惕肉瞤者經絡之血為瘡所耗不能榮養肌肉主持筋脉
故惕惕然而手足自跳瞤瞤然而膚肉自動也不可謂之寒戰
但養其氣血十全大補湯 三十八 主之

咬牙呵欠者肝虛也肝屬木臨官於寅寅為相火火盜木之氣
故肝虛之證形焉陽引而上陰引而下則開而欠也陽上極而
下陰下極而上則合而嚙也十全大補湯主之 三十八

上竅咬牙者心熱也諸瘡皆屬心火上竅者火炎上之象也
牙者火氣動搖之象也導赤散三十加酒炒黃連牛旁子主之
○如寒戰咬牙併作者則少陰專主之觀其瘡本

○如瘡本潰爛寒戰咬牙者此手少陰心火也經曰熱勝則肉腐
寒戰咬牙火氣動搖之象也

○如瘡本焦黑寒戰咬牙者此足少陰腎水也腎色黑為主蟄封
藏之本乾黑者真臟色見也腎氣寒在變動為慄寒戰者腎水
病也腎主骨牙者骨之餘寒戰則鼓頷而兩牙相軋咬牙者腎
寒所發也此二證者在心熱則清之在腎寒則溫之其病已壞
治之何益

○暴啞失聲

痘瘡最要語聲清明若有猝失音者凶兆也先哲有言曰瘡已出而聲不變者形病也瘡未出而聲變者氣病也瘡出而聲不出者形氣俱病也其候有三須要識得

○有心刑肺而失音者肺屬金主聲中有二十四空凡發諸語言者皆其空中之氣鼓動也五行金空則鳴實則啞瘡疹之火起於心上薰於肺肺氣脹鬱故竅塞而無聲也以道赤散五十五合甘桔湯七加炒牛蒡子主之或甘桔湯加炒牛蒡子天花粉蘇葉主之

有心虛而語聲低小不出者叔和心臟歌云聲言癸氣清益心

主血疽瘡稠密其瘡都要實得血為虧損故也血去舍空故聲不揚以導赤散加人參麥門冬石菖蒲王之

○有毒歸腎而失聲者經曰足之少陰上繫於舌絡於橫骨終於會厭會厭者音聲之戶也舌者音聲之機也橫骨者神氣所使主發舌者也瘡品陷伏則毒入腎邪氣上客於厭則厭不能發發不能出開闔不利故猝啞也

○有喉舌潰爛而失聲者咽喉者所以司呼吸納飲食發音聲猶管籥也毒火上薰咽喉先受責門會厭舌腭之位皆瘡所聚初出之時失於調治以致咽喉腫塞管籥窄狹舌本強硬呼吸不能飲食不入音聲不出矣此上二證治之則難

○噎水吐食

難經云會厭為吸門胃為賁門病疸之人毒火上薰於肺灼於胃肺與胃之上口皆有瘡而傷矣水入則噎者賁門傷則水不得入溢入會厭會厭擗而不內故氣逆噴出而噎也食入則吐者賁門傷則門戶隘塞食物不能直奔於胃緩則汨汨而下急則阻而吐也矣此其惡候鮮有生者其或舌上有瘡爛破如蜂窠之狀舌痛強硬不能為用延納水穀亦使水入則噎食入則吐待舌瘡平則安矣